

In Ladin a Flem

Co plaschi al salter a la sessiun?

■ (anr/vi) **Walter Pfister** è dapi 18 onns salter en il cussegl dals chantuns. El è per «ti» cun ils pli blers politichers da la chombra pitschna. Pfister è naschi a Strada ed è creschì si a Samedan.

Sco salter essas Vos gia stads a la sessiun «extra muros» a Genevra, Vos savais, co gl'è stà a Lugano? Co èsi da lavurar ordaiifer la chasa federala?

Walter Pfister: Igl è sco ina sessiun normala. Be ch'i dat bler dapli lavur avant la sessiun. Per nus salters n'èsi betg ina gronda midada.

Tge differenza dat en egl tranter la sessiun a Genevra ed a Flem?

A Genevra eran nus en in grond center, nua ch'ins è disà da far conferenzas. Qua essan nus en in hotel. Ma nus avain provà da far il meglier londerora.

Essas Vos l'emprima giada en Surselva?

Na, na. Jau hai fatg bler militar en la regiun.

Sco Ladin fissas Vos segir pli gugent ad ina sessiun en l'Engiadina?

Boh! Il viadi fiss lura era stà pli lung. Il chantun Grischun, e cunzunt la Rumantschia, avessan da lavurar ensemen. Uschiglio na cuntanschan els betg lur finamiras.



Sco salter ha Walter Pfister da chalzerar l'entir di cun plunas d'actas e corrispondenza. El fa tut per ch'ils cusseglers hajan uschè lev sco pussaivel.

FOTO C. CADRUVI

Donn è in pau ch'ils Grischuns crain che nus sajan a Flem en vacanzas. Las medias han scrit quai uschia, ma quai nun es vair. La sessiun es bain chargiada, uschia che las sesidas van enfin l'ina da mezdi.

Cu stuais vos levar la damaun?

Nus stuain star si da las 5.30. Cumenzar a lavurar stuain nus da las 6.30.

Quai na tuna betg da vacanzas?

Che blers crain che nus avain ina sessiun leva, è be in «spleen» da las medias.

Tge èn Vossas incumbensas sco salter?

Nus preparain tut ils palpiris per il cussegl. Nus guardain ch'ils parlamentararis

han uschè lev sco pussaivel e prendain giu ad els bleras lavurs. Sch'in cussegljer vul per exempel savair da tge uras ch'il tren u la posta partan, tschertgain nus ils uraris. Sch'insatgi dovra in artitgel d'ina gassetta, organisain nus quai.

Vos stuais en quest cas curren l'entir di?

Gea, i dovra vairamain buns chalzers.